

24/03/1997

Tol semua jalan pilihan terakhir

Izman Ismail

KUALA LUMPUR, Ahad - Datuk Seri Dr Mahathir Mohamad berkata, kerajaan belum membuat sebarang keputusan untuk mengenakan tol di semua jalan pilihan tetapi tidak menolak kemungkinan ia akan dikenakan pada masa depan.

Menurut Perdana Menteri, kerajaan tidak dapat memberi jaminan itu kerana untuk membiayai pembinaan jalan yang selesa tanpa tol akan menyebabkan kerajaan menanggung kos yang terlalu tinggi.

Beliau tidak bersetuju cukai jalan dihapuskan jika jalan pilihan dikenakan tol kerana cukai berkenaan akan diagihkan untuk perkhidmatan lain kepada pemilik kereta.

"Buat masa ini, kerajaan belum membuat keputusan tetapi mungkin pada suatu hari, kita tidak ada jalan melainkan dengan kenakan tol. Ini adalah langkah yang terakhir.

"Dulu jalan Kuala Lumpur ke Seremban tidak kena bayar tetapi berliku-liku dan jauh sehingga akhirnya pengguna berpendapat mereka terpaksa menanggung kos berlebihan dan tidak ada untung.

"Sebenarnya tol mengurangkan kos, ini orang tak faham, kita guna jalan alternatif tetapi tidak elok dan jauh, banyak orang tak ambil kira, lebuhraya memendekkan perjalanan dan selesa, kita dapat banyak manfaat walaupun kita bayar tol," katanya dalam sidang akhbar di Lapangan Terbang Sultan Abdul Aziz Shah sekembalinya dari Riyadh, Arab Saudi, petang ini.

Perdana Menteri berada di negara berkenaan untuk menerima Anugerah Antarabangsa Raja Faisal 1997, malam kelmarin. Beliau diiringi Datin Seri Dr Siti Hasmah Mohd Ali dan Menteri di Jabatan Perdana Menteri, Datuk Dr Abdul Hamid Othman.

Anugerah itu disampaikan oleh Putera Sultan Abdul Aziz al-Saud yang juga Timbalan Perdana Menteri kedua serta Menteri Pertahanan dan Penerbangan sebagai mewakili Raja Fadh.

Dr Mahathir menerima sijil, medal emas dan wang tunai RM500,000. Perdana Menteri juga berkata, pada masa ini, orang ramai sudah menyedari kelebihan lebuhraya dan bersedia membayar tol.

Menurutnya, ini menyebabkan masalah jalan alternatif tidak berbangkit lagi melainkan sikap sesetengah pihak yang enggan membayar walaupun untuk menggunakan kemudahan yang lebih baik.

"Ada orang degil yang tidak mahu bayar, yang buat macam-macam angkara, ada sesetengah yang tak mahu bayar langsung dan sanggup ke mahkamah," katanya.

Sebelum ini, Menteri Kerja Raya, Datuk Seri S Samy Vellu, berkata kerajaan akan menswastakan jalan lama antara Kuala Lumpur dan Seremban yang menjadikan tidak ada jalan tanpa tol dari sini ke Seremban.

Menurutnya, peruntukan yang memerlukan jalan pilihan dibina bagi pengguna yang tidak mahu membayar tol sudah tidak timbul.

Beliau berkata, keputusan itu adalah sebagai persiapan menghadapi kesesakan di antara ibu negara dan Seremban berikutan pertambahan kenderaan di jalan terbabit.

(END)